


FASNACHTSGESELLSCHAFT



BASEL ALTI GARDE GEGR. 1995

文字拍 老卫兵

Fasnacht 2012

Am Gängelband vom Mao-Land

在毛之国的风筝线上

Dunggli Wullgge hängge iiber em Wirtschafts-Himmel
Und e kalte Wind bloost aim ins Gnigg
Doodeglogge lytte s Untergangsgebimmel
Und d Polidigg zaigt weenig Gschigg.
In Amerika het mes bereits erlääbe kenne
Wies isch, wenn me uf Bump duet lääbe
Wenn d Schulde uf de Neegel brenne
Und zwische Arm und Rych effne sich Grääbe.
Au d Euro-Länder sin stargg verschuldet
E jeedes Land wird schnäll zum Habenichts
Und drotdämm wärde d Schulde duldet
S Yys isch dünn, me wais, bald brichts.
Nadyrlig gits au in dr EU Schrangge
Wo d Verschuldigsgränze limitiere
Doch es futiere sich Politigg und Bangge
Denn jeede mecht nomee garniere.
Do wird syt Joore iiber de Verheltnis gläbbt
Mit Spitzelöön und Friehpension
Statt no Flyss wird halt no Fulhait gsträbbt
Denn wär voll schafft, dä isch dr Gloon.
Und Styyre zaalt me erscht rächt kaini
Wär rych isch, druggt sich vo dääre Pflicht
Die groossi Masse sin aimool mee die arme Heini
Denn Styyrbedruug kunnt kuum vors Gricht.
So duet me d Schulde mit nomee Schulde stopfe
Und d Boniteet goot d Schyssgass ab
Verloore sin lengscht Malz und Hopfe
Und d Wirtschaft macht au ganz schnäll schlapp.
Wenn Schuldner andere Schuldner Gäld dien leene
Und s aigedlig das Gäld jo gaar nid git
Denn duet me so doch s Volgg verheene
Und zieht die ganzi Volggswirtschaft in Abgrund mit.
Mit Schulde duet me d Staatslöön zaale
Mit nomee Schulde zaalt me d Zinse
Und s Volgg suuggt men uus, das lyydet Quaale
Und d Waggstumsplään die geen in d Binse.
Will me d Arbeitsplätz scho lengscht verschooobe het,
In Billigländer wos nyt koschte duet
Drillt sich e mänge schloofloos znacht im Bett
Isch arbetsloos und het e Wuet.
Wär kei Arbet het wird armegnessig
Und hänggt am Almosedropf vom Staat
Denn uusgstyyrt sy isch nid so lessig

Und e Leesig het e kein baraat.
D Kapitalspiraale duet sich abwärts drille
D Wirtschaftsleischtig isch nimme guet
Und jeede hofft fir sich im Stille
As är nit in dä Struudel drykoo duet.
Ai Gryysegipfel jaggt dr ander
E jeede Staat hofft uf die groossi Hilf
Es entstoot e hailloos Duurenander
Und doch stoot jede ganz elai im Schilf.
Die groossi Leesig erhofft me sich vom Oschte
Denn Kiina haig schyns s neetig Kapitaal
Die Hilf wird zwoor e Huffe koschte
Doch ooni Kiina blybbt halt d Laag fataal.
Das groossi Land mit syne Masse
Vom Weschte joorzäänte lang boykotiert
Wird jetz uf aimool, me kaa s kuum fasse,
As potenzielle Retter vom Kapital hofiert.
Wo dr Vorsitzendi Mao im blaue Ainhaitesgwändli
Dr Kommunissmus iiber Joore vorgläbbt het
Und indoktriniert het mit em rote Biechli in de Händli
Dert goot me uf aimool mit em Kapital ins Bett.
Wo friehner e Schaale Ryys als Loon het miese länge
Und als Norm me siibe Dääg het gschafft
Dert herrscht jetz bletzlig s grooss Gedränge
Am Fleischtopf vo dr Kapitalwirtschaft.
Fascht iiber Nacht isch Kiina e Finanzmacht worde
Wo uf em Wältmärt sait woos duure goot
Und kineesisch gstryrti Bänggerhorde
Profitiere vom Kapitalismus syynere Noot.
Die ney stargg Wäärig isch dr Yuan
Dr Euro und dr Dollar kaasch bald vergässe
Jetze spiile d Kineese dr Don Juan
Und dr Weschte wird vo Kiina gfrässe.
So hängt dr Kapitalismus jetz am Dropf
Vom Kommunismus - soo ne Schand!
Und dr Weschte lauft mit gsänggtem Kopf
Am Gängelband vom Mao-Land.

Am Gängelband vo dr Frau Fasnacht bisch an
dr Ladärne-Usstellig uff em Minschterblatz oder
uff em Kasärneblatz an dr Usstellig vo de
Wääge- und Reggwisyte vom Mäntig Zoobe bis
am Mittwoch demorge.

www.muggedaetscher.ch